

INSTRVCTION SOMMAIRE POVR
les cinq Prouvinciaux de France de l'Ordre des Freres
Prescheurs, concernant l'affaire du Nouiciat Generl
du Fauxbourg S. Germain, Inthimés-

*C O N T R E aucuns Religieux dudit Nouiciat, appelans
comme d'abus, & autres particuliers Religieux de la Mai-
son Sainct Honoré, Interuenans.*



L est si peu seant aux Religieux d'vser d'inuectiues & d'injures contre leurs freres, que les Inthimez ne veulent respondre à toutes celles qu'ont fait dans leur Factum les Appelans, contre ceux qu'ils ont sceu s'opposer à leur mauuais droict. Qu'ils se contentent de montrer l'injustice de leur cause, par la production qu'ils font des pieces justificatiues de cette affaire; laquelle ne consiste que dans la manutention du veritable establisement de la Maison du Nouiciat du Fauxbourg S. Germain.

Louis XIII. à qui la pieté & la justice ont acquis le nom de Iuste, desirant voir dans son Royaume le reestablisement de l'ancienne ferueur des Religieux de tous les Ordres, soustint autant qu'il peut toutes les Reformes qui commencerent, ou qui estoient desia establies de son Regne. Mais dautant que celle qui se trouuoit dans l'Ordre de saint Dominique, en la Congregation de saint Louis, ne pouuoit pas aussi promptement que l'on eust pû souhaitter donner remede à toutes les Prouinces de France. Le R. P. Nicolas Rodolphe, pour lors General de l'Ordre S. Dominique, faisant ces Visites dans ce Royaume, ayant obtenu deux Brefs de Nostre Saint Pere le Pape Urbain huiëtiesme, par lesquels pour l'establisement de la Reforme dans tout ledit Ordre, sa Saincteté derogeoit à ces Coustumes & Constitutions. Il supplia le Roy de luy accorder ses Lettres Patentes pour l'establis-

ment d'une Maison qui fust immédiatement sous luy; & qui n'estant que comme vn Seminaire General, d'où l'on peust prendre des Religieux propres pour soustenir & establir la Reforme dans les Conuents qui la demanderoient; ne seroit qu'un simple Nouiciat, & par consequent, comme l'on peut juger, n'auroit aucun des droits dont les autres Conuents jouissent; à sçauoir ceux d'Affiliation, d'election d'un Prieur, & d'union à quelque Prouince ou Congregation particuliere: Le Roy les luy accorda tres-volontiers en des termes si exprés & si conformes à ce dessein, qu'il ne faut que les lire pour voir, si sa Majesté a eu autre dessein que ce-luy là. page 3.

Ces Lettres ayant esté verifiées en Parlement, & sur icelles l'establissement s'estant ensuiuy, Monsieur le Cardinal de Richelieu fist donation de deux mil liures de rente à cette Maison, comme à vn Seminaire de tout l'Ordre de saint Dominique; voulant & ordonnant par son Contract, qu'au cas que ledit Nouiciat fust supprimé, ou n'executât pas les clauses de sa fondation, lesdites deux mil liures retourneroient au profit de ses heritiers, pag. 5. Ce qui sans doute n'aduiendroit que trop, si la Cour jugeoit au profit des Appelans, n'estant pas possible que ladite Maison peust seruir de Nouiciat & de Seminaire General, si elle auoit des enfans, & qu'elle se trouuât vnüe à vn corps.

Aussi (& cecy est extrêmement à remarquer, pour montrer que la Congregation de S. Louïs ne peut auoir aucun droit en cette Maison) dès son establissement le R. P. General la mit si absolument sous sa conduite, qu'à cause que suiuant vn Decret qu'il auoit fait, que ceux qui sortiroient de la Congregation de S. Louïs n'en seroient plus enfans; & qu'en effect, desia quelques-uns pretendoient que ceux que l'on en auoit tirez pour commencer cét establissement en estoient exclus: Ledit R. P. General par Patente expresse, declara que ces pretentions estoient fausses, & que lesdits Religieux estoient de ladite Congregation, & auoient droit d'y retourner quand il luy plairoit leur ordonner, page 10.

Mais d'autant que cét establissement sembloit choquer l'ancienne forme de l'Ordre, le R. P. General ne se contenta pas d'auoir en ce cas l'autorité du Pape, & du Roy: mais voulut aussi que le

premier Chapitre General tenu à Rome, acceptât ledit Nouiciat, selon les loix de son Institution, page 11.

Et quoy que les Religieux qui auoient esté receus dans cette Maison commençassent à se plaindre de celuy qui en auoit la charge, & des reglemens qu'on y auoit establis, & qu'on y obseruoit; neantmoins après que leurs plaintes eurent esté entendues au Definitoire, il fut derechef confirmé en sa charge, & lesdits reglemens maintenus & autorisez par Decret du susdit Chapitre, & Patente expresse du R. P. General, qui furent si conformément receuës de tous les Religieux qui estoient dans le Nouiciat, que tous ceux qui forment maintenant ce procès les ont accepté, & soubigné de leur main, page 13.

Cet ordre d'un Chapitre General eust esté sans doute suffisant pour des Religieux aussi soumis que doiuent estre des Reformez, & particulièrement ceux du Nouiciat, qu'ils ne peuvent sans se meconnoistre, n'auoir pas qu'ils sont deputez pour instruire les autres dans l'Obseruance; neantmoins afin que l'on remediât à toutes les plaintes, dont les Appelans font maintenant leurs principales raisons; Le R. P. General donna des Affiliations à tous ceux de cette Maison dans d'autres Conuents de l'Ordre, & fit qu'elles y furent receuës dans toutes les formes requises & necessaires: Ce qui se verra assés clairement, si l'on veut prendre la peine de lire la declaration qu'en a donné le R. P. Dominique le Brun, Vicaire General de la Congregation de S. Louis, vne des principales parties dans cette affaire, page 21.

Et pour empescher qu'à l'aduenir on ne peût dans le Nouiciat pretendre de droict d'affiliation, il ordonna (afin qu'il demeurât pour Seminaire General de toute la France) que personne n'y peût estre affilié, & que tous ceux qui y seroient receus seroient receus pour d'autres Conuents, page 14.

Or d'autant que toutes ces Ordonnances & tous ces Reglemens pouuoient estre infirmes, à cause qu'il est necessaire dans l'Ordre de Saint Dominique, que dans l'establissement de quelque nouveauté, elle soit confirmée par trois Chapitres Generaux consecutifs: Celuy de Valance, tenu l'an 1647. ne manqua pas de les confirmer, page 15. & celuy de Rome 1650. en a fait vn Decret si ample, qu'on peut voir, si on ce donne la peine de le lire, non

seulement comme il les a confirmé, mais aussi combien l'ordre a apporté de soin pour maintenir cette Maison dans son premier établissement, & empêcher les injustes plaintes des Appelans, page 19.

Par cecy, certes, l'on peut voir maintenant avec combien d'injustice les Appelans veulent infirmer vn établissement fait par l'autorité du Pape, du Roy, & de trois Chapitres Generaux consecutifs (qui sont loy dans l'Ordre de Saint Dominique:) Mais si l'on adjouste que ces raisons ayant esté meurement pesées par le Conseil. Il a, par son Arrest du 16. May 1651. (page 31.) débouté les Appelans de leurs demandes, & declare nul & comme non aduenul' aduis qu'ils auoient obtenu par surprise, & sans ouïr partie, de quelques-vns Nostreigneurs les Prelats, Conseillers d'Estat, Curés, & Religieux, par lequel ils jugeoient que les Religieux du Nouiciat pouuoient jouir des droits d'Affiliation, l'Election d'un Prieur, & d'Vnion à la Congregation de S. Louis. Qui estoit la meilleure piece qu'ils peussent produire: & qui doit faire esperer aux Inthimés, que la Cour ne sera pas moins juste que le Conseil.

Il est vray que les Appelans pour obtenir ces trois Chefs; à sçauoir l'vion à la Congregation de Saint Louis, le droit d'affiliation, & d'élection de Prieur. Disent que ces graces sont communes à tous les Religieux de l'Ordre S. Dominique, duquel, comme ils pratiquent les plus grandes austerités, il est aussi juste qu'ils jouissent des plus legitimes aduantages. Qu'il est constant que les Constitutions de l'Ordre veulent, que ceux qui ont pris l'habit, & fait Profession pour vne Maison, (comme ils pretendent auoir fait pour le Nouiciat) en soient les enfans, & que par tant ils ne peuvent estre priués de ce droit. En fin, qu'une Maison ne peut demeurer seule sans inconuenient; & qu'au reste il est fort contraire au bien de l'Estat, qu'un Superieur estranger aye dans la capitale du Royaume vne Maison qui despende de luy, & dans laquelle il mette vn Superieur.

Mais qui ne voit que l'Ordre ne les veut pas priuer des aduantages qu'ils doiuent auoir, puis que dans les Conuents où ils son affiliés, & dans ceux où ils sont assignés, ils ont non seulement droit d'élection du Prieur, comme tous les autres Religieux,
mais

mais aussi jouissent de tous les autres droits de l'Ordre ; & par-
tant leur premiere plainte est vaine.

Pour la seconde , il ne faut , pour juger de sa justice , que se
ressouvenir, que la Maison du Nouciat, n'a esté faite qu'en con-
sequence des Brefs derogatoires aux Constitutions , & que de
plus, la cassation du droit d'affiliation a esté plus que suffisamment
approuvée par l'Ordre , puis que tous les Chapitres Generaux
qui se sont tenus depuis , l'ont confirmée. Et qu'en fin il seroit im-
possible que cette Maison fust vn Seminaire General, si ceux qui
y peuuent prendre l'habit en demeuroient enfans ; puis que dans
peu elle en pourroit estre tellement surchargée, qu'elle ne pour-
roit plus en recevoir d'autres pour les instruire à la Reforme : Au
reste, s'ils demandent si ardemment affiliation au Nouciat, pour-
quoy ont-ils receu celles qu'on leurs a donné pour d'autres Con-
uents ? pourquoy ont-elles esté inserées dans le liure des Profes-
sions ? & pourquoy ceux qui en veulent jouir, en jouissent-ils pai-
siblement ?

Quand à la derniere, il ne faut pas estre fort intelligent pour
voir qu'elle est tres-friuele , puis que s'il nous falloit toujourns
estre presens, pour remedier aux choses qui sont sous nostre con-
duite, nos esprits n'auroient pas des actions plus aduantageuses
que nos corps, qui par leur matiere sont reduits à cette necessité.
Aussi l'experience nous fait assés cognoistre, que l'éloignement
des lieux n'empesche pas que les Superieurs ne puissent regler ce
qui est sous leur charge ; puis que leur autorité deuant estre ve-
nerable à tous ceux qui leur sont soumis, il ne faut qu'en eux de
l'obeissance & de la soumission pour regler les plus grandes discor-
des, & remedier à tous les accidens qui peuuent arriuer dans les
Conuents. De plus, il est tres ordinaire dans l'Ordre, d'enuoyer
en des occasions importantes des Commissaires & des Visiteurs,
qui peuuent faire dans leurs visites, tout ce que les Superieurs
feroient eux-mesmes s'ils estoient presens. Et l'on sçaura assés que
le R. P. General s'est voulu seruir de ce remede, par la commis-
sion qu'il a donnée, pour la visite du Nouciat, au R. P. Bernard
Guyard, registrée en Parlement, si elle n'auoit esté empeschée.
pag. 15.

Pour ce qui est des interets d'Estat qu'ils y mettent ; suffit, pour

voir comme ils ne se seruent de ce prétexté quē par malicē, que non seulement, il y a des Ordres tous entiers qui sont dans le gouvernement si absolu de leur General, que les principaux Supérieurs sont mis de sa main, & qu'une personne ne peut passer Profex sans sa permission. Mais aussi que c'est Monsieur le Cardinal de Richelieu qui a fait cēt establisement, & qui sans doute ne l'auroit peu souffrir, ny autoriser, si luy qui auoit tant de lumieres dans la Politique, eusse peu apprehender les inconueniens que veulent persuader à la Cour quelques pauvres Religieux: Outre que sa prudence a remedié à tout, quand il a fait, que le Supérieur ne peut estre que François, & sujet du Roy.

La Cour jugera s'il luy plaist, si les Appelans ont esté capables de trouuer à redire à ce qu'a fait vn si grand homme, quelle foy elle doit donner à toutes les calomnies qu'ils ont publié dans leur Factum, contre ceux qu'ils ont creu agir dans cette affaire. Aussi les Inthimés s'asseurent-t'ils que si l'on empesche aux Appelans ce procedé indigne de leur profession, & contraire au Christianisme, les obligeant d'agir par raison, & sur des pieces antiques, ils se condamneront eux-mesmes, & donneront à la Cour lieu de les demettre de leurs pretentions, & conseruer l'establisement de la Maison du Nouiciat du Fauxbourg S. Germain, selon la teneur des Lettres Patentes du Roy registrées au Parlement, du Contract de fondation de Monsieur le Cardinal de Richelieu, les Decrets des Chapitres Generaux, & les Ordonnances des R. P. Generaux de l'Ordre, sans qu'ils en osent murmurer.

